

四庫全書

集部

欽定四庫全書

石倉歷代詩選卷四百十七

明 曹學佺 編

明詩次集五十一

文洪

對菊

蓐收肅霜威草木咸凋瘵  
睠茲東籬叢孤芳可人意  
迎風散奇芬浥露含幽思  
吾生抱孤僻茲焉獨云契  
醉誦

離騷經閒咏柴桑句外慕苟不羈蕭然有真味

三荒徑

種竹滿東原清陰接隣壤三逕未全荒秋風吹灌莽不  
容車馬過幽人自來往

常關門

青苔滿蘿逕白雲護雙扉非關習性懶地偏人迹稀春  
風翠簾捲惟有燕來歸

西疇舍

綠野佳雨霽芳條青鳥鳴東作念良日西疇課農耕丘  
園無俗事隴畝有閒情

棹舟溪

清谿不可唾時時載輕舟鮮飈漾文裾弱漿依寒流禽  
魚共翔泳日晚更夷猶

窈窕谿

平生謝幼輿寄情在一壑豈無治世才不易閒居樂酒  
醒山月高松風自迴薄

宛轉歌

宛轉復宛轉宛轉情無斷  
郎情似車輪妾情似香篆  
車停輪亦歇香盡篆亦滅  
郎情與妾情宛轉何時輟

友人陳君竹圃

主人自種千頭竹手洗長竿結為屋  
層層蒼翠作深幃  
瑟瑟清風響寒玉湘雲一片蔽晴空  
卓午猶疑未晨旭  
炎炎赤日燒空時涼陰四布無纖燠也  
知高興比王猷  
終日臨軒面晴綠

村墅雜咏

春雨朝初霽居南似錦沙  
野猿窺落果林蝶戀殘花  
引水斜穿沼編籬密護家  
何憑消永日欹枕讀南華

其二

納涼開北牖防雨覆西垣  
自得翻書趣渾忘對客言  
徑陰螻蟻集林暝鷓鴣喧  
分得清溪水時時灌藥園

其三

楊柳津亭北幽軒瞰碧波  
綠鋪雲葉足紅落雨花多  
載

鶴湖中放看猿澗底過有時攜短策松下聽山歌

畫景

尺素山千頃雲多路更深人行巢鶴磴寺接掛猿林雨  
過朝添礪霞生晚護岑江南舊風景時得畫中尋

出白土

晨興即長路曙色喜初分白土家家店青山處處墳虎  
踪當路見雞唱隔林聞遊子心中事悠然嶺上雲

書燈

小小銀缸短短檠紙屏風定煖浮馨春花一穗吐金粟  
秋水半泓涵素星致用不宜筵上舞專功應廢案頭螢  
他年肯作牆根棄傳與兒曹照一經

北行道中述懷

獨攜憔悴上京華行李三十北望賒親老誤將身許國  
歲殘時有夢還家聲催落木風添信陰結層空雪弄花  
客緒慊慊排不得坐籠紗帽自煎茶

高郵湖



參差城郭是高郵望望平湖不盡頭初日蒼涼波底湧  
閒雲零亂水心浮平分烟樹藏村塢並立鸕鷀傍釣舟  
一笑乘風馳百里片帆回首失揚州

自君之出矣

自君之出矣鸞鏡護常深留待君歸日持將照妾心

阻雨

偶尋君至得身閒十載情懷一笑間天意不教人劇別  
斜風吹雨暗前山

宿遷夜行

雲籠新月映青霄坐啓孤蓬促去橈積雪滿川風色緊  
旅懷添得是今宵

漁歌

斜陽詩思繞寒汀何處秋風款乃聲水渺蒹葭情不極  
錦溪橋下白烟生

文林

字宗儒  
洪長子

冬日感興

落木園林空方池水深碧物色垂澹蕩寂然屏人跡杖  
藜撫孤松箕踞松下石西山入懷青寒鳥歛歸翻浩浩  
宇宙間流光目相迫大化豈有終初陽潛地脉

永嘉縣齋寫懷

墨綬垂青絲銅符寵郎秩駕言謝班行出領滄海邑脉  
脉辭親知依依去鄉國淅行共千里已在東南僻地遠  
形勢殊年貧正艱食自顧書生愚疇堪付休戚流移已  
懷慚征歛况余職平生跌宕懷雅志山水適及此東嘉

遊清真信靈域豈無康樂情坐有民社責歛板事承迎  
鈎稽困文籍拂意不能歸自慚陶彭澤

答沈啓南

天運有盈虛人苦不自足已登九列階仍顧千鍾祿黃  
鵠豈不高中路將焉宿所以柴桑翁無心適華屋瀚海  
辭風波郊居夢花竹歛余百年身及此未危辱愧君先  
機言一紙百過讀

家居小樓會客分得足字

宦遊本夙好負疴厭馳逐  
黽勉歸故園倦鳥今止宿  
朋舊月一飲值我會再續  
摘蔬夜猶鮮漉酒冬已熟  
薄言譙樓居飽豈在梁肉  
白雲墮書几鳴鳩隔林屋  
過雨阻新暑首夏氣清淑  
及茲風日佳泥飲勿辭足

首夏齋居即事

幽齋坐織雨綠樹繚周垣  
青山在屋上好鳥如晤言  
一官居野寺性本愛丘園  
松花飽日食沆瀣供朝飧  
遊神羲皇上形槁心獨存  
緇塵暗岐路吾方掩柴門

與二弟汎舟遊吳氏東莊因寄匏菴

緣城畛流水榆柳綠蔭門  
舫舟信登陟忽得吳公園  
小亭面高岡蘿徑隱可捫  
青山出牆頭白雲宿籬根  
歌鶯滯池曲遊魚戲波渾  
繁景當首夏過雨氣微溫  
老我獨已樂偕有弟與昆  
清唱散林木起行歷郊原  
日斜亂人影眷戀忘歸轅  
水木余夙好况茲故情敦  
主人方宦達樂事誰與論  
室邇人則遐相思黯銷魂  
出處各有會一笑傾餘樽

七里隆

青山慙吾意舟子莫余違言茲隆中遊兀坐敞艫扉須  
臾來萬狀雲水鎮依依儼居方池中四面單翠幃偃仰  
斷且續高下墮還飛插天蔽星斗伏地堪漁磯平平羅  
几案整整列鼓旗大將坐橫劍萬馬紛而馳呀然散不  
收忽合如長圍如行圖畫中而罔筆墨畦平生跌宕懷  
老大丘壑姿不圖行役地乃與勝境期惜哉南北人安  
得久于斯

聞温州之命東啓南

野人安隴畝方春亟農工誰傳一尺詔置我樊籠中緬  
懷漢四皓亦有楚兩龔斯人咸肆志衰病顧登庸聖君  
豈不憐萬里誰為通新詩特勸駕慚愧石田翁

博平春半述懷

土城半頽人十戶月出無烟望多樹樹枯自念天正寒  
雪消忽計春將暮却憐青帝亦世情可奈東風不相顧  
野老立庭言貌古漫呼爾汝忘官府府牒聯翩呵不辨



從吏木僵心益苦真性不揖督郵怒獨抱瑤琴調鶴舞  
平生肯落塵網牽居然朗誦逍遙篇天地造化一鑪冶  
萬物銷鑄猶銅鉛嫫母施朱西子醜松栢黠淡桃李鮮  
浮雲富貴聊爾耳被酒北窻高枕眠不能作書上宰相  
不能內徙如登仙不能飽和淵明詩不能遺愛受一錢  
簿書往復祇押字官舍間寂如逃禪饑民且勿向我泣  
我不謀遷歛爾急今年休怨役不均新來縣官難處分

張憲副山水障子

山高出雲在平地千村萬落連春水乾坤氤氲元氣濕  
江湖滿地流瀾瀾糝糊雜樹綠滿眼毫末閒花紅半壘  
忽見芳洲草瀾間微露樓臺烟雨裏山家茅屋晝不關  
背暄高閣深厓間山人對奕長不語客載小舟何時還  
斜橋引出灤西路歌岸直抵涇南渡開圖恍入洞庭遊  
又似天台靈隱去耳邊汨汨聞溪聲堂上真疑結嵐霧  
蓬萊閨苑想在此青鞋布襪宜相顧試問神仙結遊伴  
却我冠裳塵土滿幾時置我圖畫中還似神仙更蕭散

留別滄州先生

東去清風滿淞帆東甌更在淞東南班行已失羣公隊  
陋巷猶停長者驂中外于人何可擇卑微在我本來甘  
平生學道求無愧此去親民況所耽疎遠漸勞京國夢  
睽離偏惜故人談時名有忌愁多取官業如禪且靜參  
縣僻還聞山水勝地連粗喜土風諳遙應到日思君地  
秋水凝神月滿潭

入雁蕩

山深斷車馬雞犬亦蕭疎  
澗道散蒼莽峰巒翔紫虛  
扳援絕鳥道宛轉得僧廬  
不覺凌絕頂身寒雲滿裾

泰安靈巖寺

足馬强支持長途入翠微  
山高日初上秋老樹還稀  
門外一溪隔林中孤衲依  
虛堂雲臥冷似醉未能歸

永嘉縣齋懷沈石田

自古清暉地分官得永嘉  
秋深熱後雨霜薄樹猶花  
到海江流盡帶山城郭斜  
乘船看脩竹疑是到君家

宿青陽驛

市冷人家靜途長客思增夜潮舟浸月寒渡水流冰破  
驛沈高岸疎林見遠燈空囊寒食近瀚海一浮僧

濟寧

客棹一身渺歸程千里多寒雲挾疎雨秋水逝洪波亭  
界短長道泉分南北河醉醒蓬底坐何處起漁歌

靜海驛

深夜驛途靜長河瀚海通舟明沈水月燈暗落潮風暝

色浮烟外春光欲雨中年年苦行役踪跡任飄蓬

對飲

行厨薄羅列僚友共徘徊心豁溪山淨酒酣風雨來長  
林孤鳥沒近寺一僧回倚杖看城市黃埃漫作堆

京口公館柬楊應寧

清明寂依舊旅館正思君春色計半去江聲來獨聞畏  
寒猶宿火移坐盼斜曛咫尺睽離地悠悠隔暮雲

金華道中憶君謙

遠別輕千里經行歷萬山  
思君終夕坐出守幾時還  
隄柳吹花盡溪雲過雨閒  
南峰著書處夢裏更躋攀

喜桑民懌至自吳門

奔走卑官歲再更江湖偏重別離情  
逢君怒罵為知己顧我摧顏負此生  
細雨燈花銷午夜青山詩思繞孤城  
自慚不是臨邛令潦倒安能重長卿

歲暮客錢塘邦彥徵君以詩招飲席間因次其

韻

隱君瀟灑有高齋，徑造何煩折簡催。  
雪砌宜人寒不掃，溪門待客夜還開。  
離離燈火分春色，奕奕梅花照酒杯。  
笑殺山陰王長史，不逢安道為誰來。

醉翁亭

翼翼丘亭倚磻瀆，亭前草樹澗前雲。  
西南正據瑯琊勝，今古難追六一文。  
客散依然禽鳥樂，山空獨有水泉聞。  
蒼頭白髮聊能醉，不是當時舊使君。

答杜言符兼謝贈畫



老淹牧園敢言清祇覺驅馳負此生流水宦情秋澹薄  
碧山歸夢夜分明從前交誼誰能重眼底才名子不輕  
珍重新圖先到我淡烟疎樹不勝情

寺中春

野寺沈深門半扃午窓慵起晚風輕雲開半壁夕陽出  
花落一庭春草生鳥掠池中得魚去鶴歸雲外傍僧行  
馬曹散吏真如隱咫尺山田帶雨耕

舟行與沈良臣相失

別我天津買畫船暮雲橫射夕陽穿坐因有約常虛左  
行為無心誤向前新雁叫空秋思集短蓬驚雨夜燈懸  
逢君夢裏分明語猶滯垂楊古渡邊

乙卯初度

五十一年真醉夢百年萬事亦空花江湖况味閒偏勝  
桑梓情懷老漸嘉白髮于人無假借青山還我作生涯  
不堪潦倒逢初度倦倚長林數夕鴉

停雲館初成

林西隙地舊生涯小室幽軒次第加久矣青山終老願  
居然白板野人家百錢湖上輸奇石四季牆根樹雜花  
儘有功名都置卻酒杯詩卷送年華

寄徵明

種菊庭中花有無小山松竹近何如痴拋獨樂了公事  
悔拾浮名別故廬伏臘正懸歸老計經秋不得寄來書  
眼昏頭白今如許料理而翁正在渠

答迂

父老欣欣向我親  
爭看當日宰官身  
依然平昔丹心在  
只比從前白髮新  
行歷舊遊傷往事  
不忘遺愛愧斯民  
春風二十年間夢  
却笑今來更任真

雁蕩

肩輿倒輓百丈強  
鳥道斗絕緣青蒼  
風撩瀑布雨噴面  
天墮石梯雲滿裳  
谷中雞鳴萬籟寂  
澗底花發千巖香  
自慚凡骨不可住  
落日悵望仙人鄉

自遣

從知假面類西涼未得逃名學楚狂坐受臺評非過論  
行應老子避新郎心懸魏闕雲霄迴夢落吳松烟水長  
細數不堪何止七彊顏一出愧嵇康

博平春日

春風淡淡釀輕寒九十光陰已半殘記得故鄉今上已  
畫船簫鼓薦春盤

借居龍泉庵

冷官門戶可張羅曲徑春深長薜蘿不道夜來風雨惡

松陰滿地落花多

寄石田

秋風聞雁思無聊故國懷人首重搔  
吳楚相望一千里月明歸路不知遙

文

森

字宗嚴  
洪次子

王將軍樓船歌

江南古來傳綺語江南畫船如屋裏  
將軍總衛在江北百乘高車馬千里  
五牙富貴地非宜雲海竹窩出新理

揚川駛駢十丈蓮飛艣擘空如迸矢兩頭簫鼓沸中流  
兩岸行人看如市中間紗幕開暑風左邊設圖右邊史  
將軍受用通南北坐泛西湖與杭比還須一笑擅風流  
千古之中追郭李

登金山酌中冷泉

中冷之泉甲天下今度來遊當盛夏山僧知我有泉癖  
忙汲深清緩傾瀉煎茶有法在吾手但恐世人知或寡  
酒餘一吸除百疴從此人間賤杯筯更呼陸羽同參玄

凌風便欲飛上天下視江水空雲烟

沈啓南畫漁舟晚釣圖為毛貞夫同年題

新豐酒波堪濯足塵土紅污酒波綠粗豪飲客下馬來  
三觥五籌行促促何如並著春江船蒲茸紫立柳黃眠  
船頭釣得縮項鰻賣之儘可供酒錢夕陽射眼拉柁轉  
江光貼天孤鳥遠

憶西湖次韻

我昔西湖弄烟水日日湖邊常早起攜朋最喜當暑徂



得句每誇從醉裏昂頭率律見高峰舟行那計西與東  
荷花錦鋪香十里琳宮寶剎如迎逢望中更愛西天竺  
千仞插空青削玉萬家鱗次俱傍湖箇箇長松齊出屋  
別來屈指十五秋夢中往往時一遊蘇堤春色六橋酒  
繁華自昔同蘇州山水娛人人盡好如此西湖豈難到  
塵氛羈我嗟白頭江雲望斷空倚樓

送同年白鳳儀歸省

曲江初讌罷羨子采蘭歸驛路沾青纜江花落綠衣閒

居潘博士休沐謝玄暉他日徵才子相期入瑣闥

見月

今宵初見月最喜獨分明宿鳥從驚起浮雲莫遣生疎  
篁翻砌影寒雁落溪聲脉脉西堂下懷人百感生

九日登高

三載重陽菊開時不在家喜逢今日酒對此故園花野  
曠雲連樹天寒雁聚沙登臨無限意何處望京華

宿毗陵驛

孤舟城下宿城漏滴寒更往事無人問幽懷忽自驚春  
星垂野動村火隔江明北雁無來耗蓬窓夢不成

經張雨隱居

白日生烟霧青山隱瀑泉高名垂廣宇仙迹在遺編洞  
古疑無路花深別有天衡門下雞犬人去不知年

登樓

聞聞擾擾晚來閒獨倚危樓一望間挈榼漫沽村市酒  
開窓正對夕陽山月來虛館誰家笛風度疎鐘到竹關

只有漁翁無簡束扁舟搖曳白雲灣

書館坐雨

虛館坐來旬日雨紙窓深掩未曾開已知甲子全無准  
却怪燈花不易猜帶濕懶拖牀下履破愁頻弄掌中杯  
明朝雨散春還在擬向西山詠落梅

宿靈源寺

家城歲晚欲迴舟山寺攜衾作夜遊愛月不妨寒步影  
岸冠微覺露濡頭蒲團對語僧圍燭菊宴分題客詠秋

怪是思清還廢寢鐘聲為破小堂幽

徵明姪薦授翰林兼修國史喜而賦詩

紅燭高燒夜著花阿咸聞薦入京華銀魚佩更通仙籍  
紫閣趨時草制麻太史名傳司馬氏東山屐倒謝玄家  
書來深慰家庭慶奕世恩光未有涯

送人還南康

清波左蠡分秀色東林接日射金芙蓉香爐晚明滅

題畫

石上收綸坐垂楊拂鬢絲閒情與幽思不復許人知

春日山行

勝事春來日日忙梅花纔褪杏花香莫愁此後芳菲少  
又報東風到海棠

客夜聞蟲

露洗秋庭月滿天草根吟苦斷還連在家猶自難禁汝  
客舍長宵況獨眠

乞歸

江上鱸魚秋正肥  
李鷹安得不思歸  
自憐青鬢朝來改  
多病還應早拂衣

京師留別

宦遊無緒厭塵氛  
夜夜家山夢白雲  
來日潞河理歸棹  
月明知我倍思君

遊西山歸泛石湖

春聲病起到山家  
落盡山中桃李花  
十日徧遊那得盡  
村村塢塢焙山茶

臥病

閒居抱病怯微寒  
匣裏陰符耻更看  
中酒畏風眠不起  
烏啼花落又春殘

文氏家藏集畧

涑水公洪字公大成  
化乙酉舉孝廉署直隸涑水縣教諭  
公為人篤行勤學世稱醇儒雅好吟詠  
不事副墨興至成篇輒復散去所藏括囊稿  
蓋十之一二云溫州公林字宗儒涑水公之長子也  
成化壬辰進士博洽典籍



有經濟才宰永嘉博平二邑有聲行取至京先是東省  
鎮守巨璫廉得博平產黎大如瓶重一觔以上歛取充  
貢公恐害民令一夕伐去之璫怒行間欲危公幾不免  
乃稍遷南京太僕寺丞移疾家居久之起為温州太守  
卒於官中丞公森字宗嚴涑水公次子成化丁未進士  
授直隸慶雲縣知縣賑飢開河俱有惠政擢監察御史  
會冢宰缺有夤緣求進者公疏斥之且舉劉大夏周經  
可用下詔獄上訾其無他特答而不問後因逆瑾擅權

致仕再起陞南京太僕寺少卿考滿陞都察院僉都御史有疾乞休卒於家公為詩往往口占不留筭故所存僅百餘首

欽定四庫全書

石倉歷代詩選  
卷四百十七

石倉歷代詩選卷四百十七

欽定四庫全書

石倉歷代詩選卷四百十八

明 曹學佺 編

明詩次集五十二

吳寬

寄題陽山澄照寺

令威稟仙骨化鶴去遼東傳聞有遺井乃在青山中山  
深草木盛苔徑誰能窮爰有釋氏子於此構蓮宮殿閣

頗雄傑林杪見青紅高厓石色古小洞雲氣通神龍室  
其地上下雨兼風歲時郡長吏祈禱頻年豐我昔過東  
麓落日明丹楓所恨足力弱徒然望巖從何時躡其巔  
歷覽無忽忽回頭發浩嘆深愧南飛鴻

初夏雨霽

好雨夜來過朝陽散新晴朝回一解帶偃仰向南榮焚  
香遣塵慮讀書怡道情屋角槐初綠時聞好鳥鳴誰知  
城市裏心境有餘清

再遊城南

登高始經旬野景宛非昨園空秋葉深山淨寒雲薄清  
尊喜共持破帽拚重落日暮淡忘歸黃花翳孤壑

分題百步洪送顧工部

長河勢屈曲學海遙之東瞬息瀉千里滔滔若無窮忽  
然經彭城怒發何其雄千艘相上下往往驚篙工昔聞  
入蜀險殆與三峽同行人舉足計聊號百步洪此地山  
根繞微禹安能通鑿石尚磊磊急流為磨礮噴射聲愈

振石腹疑中空美哉河渠使慮殫力彌攻水利歸上國  
期成疏濬功月夜披羽衣清嘯黃樓中下視瓠子河枉  
築宣陽宮

秋日曝書偶閱韋蘇州集

白日落未盡竹陰滿前除翛然暑氣退高簷當雨餘新  
松無悴色萱花亦已舒偶觀草木性中懷一欣如脫帽  
被麤葛庭際方收書愛此韋郎句把誦意踟躕焚香更  
掃地適喜中堂虛累月猶在告深慚此閒居

分題圮橋送張公實

行經下邳城試訪留侯事遺蹟今何存臨流漫相指侯  
也本韓人天其畀劉氏奮擊沙中錐俯取圮下履舉足  
直受之匍匐更前跪欲為帝者師寧被老人使嗟當嬴  
政時虐酷到經史兵書尤所禁搜索徧焚毀一編出袖  
中依然先秦字乃知老人愚遠勝始皇智避世能全身  
同時類黃綺維古多斯人過客勿疑此行見滄海君終  
從赤松子



丙午郊祀齋居夜雨獨坐

時予以服  
不陪祀

春城閉重門夜館耿孤燭默坐方悄如析聲遞相續擁  
衾未成眠伴我只僮僕微雨恣飄揚寒花結羣玉員丘  
歲有事大駕朝出宿明當還法宮天意亦可卜清道少  
浮塵龍車為膏輓郊南咫尺地宿麥芽已綠願言同發  
榮皇恩被陰谷

喜雨

北方苦春旱入夏雨亦微俄然見簷溜及午正霏霏散

步荒園中不覺沾我衣草木總欣悅膏沐滋容輝昨者  
宿齋戒偏走神祠祈禮官朝入奏獨與皇心違謂此在  
朕躬聿當幹玄機宸衷之所至端能動天威今年定有  
望吾民應免飢

聞故園山茶為人所折

山花昔年植正在竹亭西雨露頻長養豈同蒿與藜廿  
年始還家見此枝猶低隔歲綴芳蕋花開剪成緹亭今  
已撤去亂石甃為隄復此與花別夢寐不能迷頗聞此

樹下春來踏成蹊  
衡門不常關  
頑童皆有攜  
如何忍攀折  
狼籍滿春泥  
遂令鳥雀至  
月夜無枝栖  
淵明問來使  
草木入詩題  
安得人愛惜  
高與南簷齊

負暄

朝坐見日升  
夕坐見日落  
午坐日更多  
煖氣如火灼  
陋居類田家  
不省在城郭  
高樹凡數株  
黃葉被霜搏  
何曾遮陽烏  
更復聚寒雀  
傍不啟窓扉  
前不垂帳幕  
炙背真可獻  
此語非善謔  
昌黎却避景  
遷坐身屢作  
我幸無此

勞竟日不展脚自我有此居綿裘不重著冬日何可愛  
可愛更可樂

望嶧山

魯郊空且曠目力安能窮條見千仞青橫截乎其東羣  
山相後先蹲踞猶兒童尼丘亦遠避何曾數龜蒙嘗讀  
禹貢書其陽產孤桐剪伐成何用茅茨舜為宮諒惟製  
琴瑟搏拊歸良工因之懷古人仰睇雲霄中

入孔林

兩楹既夢奠黯矣斯文光巍巍魯城北冠屨於焉藏墓  
木不可辨合抱千萬章知為門弟子移植來四方惟昔  
治任日相向哭且傷孰知千載下儒者猶心喪愚生復  
何幸瞻拜俄其旁我去有周末藹然覲溫良如陪游與  
夏執贄同升堂惓惓東引領夙願今始償嶧山千仞高  
泗水百里長何必四尺封天壤俱存亡

雨後答邵文敬

急雨過荒園似向城西去豐草覆清池涼風起高樹中

懷適欣欣入手得佳句累日苦炎蒸悠然在何處

重九無菊

佳節喜載臨藉有杯中祿如何籬落間獨少數枝菊遙  
遙小南城異品應滿目野人不好事移送何不速無酒  
人但醒無菊人尤俗我與陶淵明事事相反覆俗病惟  
自知客醉解留宿淵明祇欲眠往往客遭逐黃花有時  
衰一賞已自足歲宴色青青牆陰自修竹

夜坐

伐礬一何促擊柝一何遲夜景坐來寂流螢自參差片  
月不常照浮雲相蔽虧葛襟滿涼氣伏暑無炎曦坐來  
欲歛席微雨猶絲絲良夜豈不愛耿耿如有思出處有  
道在行止非人為惟應乞身後終年守茅茨

為盛舜臣題山水長卷

城西蕩雙槳遙背伍胥門人家枕河住漸喜歷鄉村豁  
然見平田農夫荷鋤去好風吹嫩苗微雨灑高樹葉間  
多放艇柳下或扳罾錦布菱荷蕩沙明鷗鷺汀魚梁接

牛宮沽酒新郭市迤邐到橫塘虹橋垂四趾亂山似遮  
路旋轉自長溪水入太湖北雲生光福西扣舷唱吳歌  
有客中流過千載懷古心悠然欲相和香徑既云沒琴  
臺亦成空山頭明月上仍照館娃宮登高信徒勞望遠  
發深喟間展圖畫看舊遊一何類

董北苑溪山風雨圖

黑雲擁高山頃刻風雨至豁然海潮聲草木爭偃地曠  
野少人行山僧獨歸寺衲衣盡沾濕敲戶何急事倉皇



村居民乘屋一何亟一婢已抱甕一婦更持器重茅惜  
被卷破尾家所寄戴笠者漁郎理網屈雙臂老翁若望  
家擔物終不棄陸走尚甚危水行可無畏前溪波浪惡  
篙折水流駛行者當早歸居者不預備良工為此圖三  
嘆有深意想見晚來晴雲淨山潑翠始信霎時間天工  
特相戲

為楊應寧題夏太卿墨竹

舍人好畫誰與儔子美詩中之劉侯鳳池退食多清暇

每抱鱣楮從人求  
昨者開筵宴賓客  
四壁彷彿橫滄洲  
酒酣指點到修竹  
數竿倒拂湘江秋  
清風脩脩刷翠羽  
孤鳳欲下中堂游  
乃知夏卿妙筆墨  
奇態縱橫纔頃刻  
歛然令我走避之  
仰面分明墮崖石  
紛紛真贋不可知  
我意是竹皆堪詩  
試看北地苦難得  
此種數尺青垂垂  
舍人好畫兼好奇  
明日南行過九疑  
扁舟夜靜月初出  
想對楚人歌竹枝

題周仲瞻藏絲花鳥

越女染絲成五色隔窓未學秦川織鮫人水底夜不眠  
乞與冰綃纔數尺洛陽名花舊譜傳品第已無天下敵  
妙手能收後素功畫苑羣工空嘆息珍禽入貢從嶺南  
長羽淨掃花間石金刀莫遣斷其尾高格豈是雄雞匹  
顧影戔戔見冠幘日午畏寒交錦翼姚黃魏紫雜鞵紅  
頓覺春風價增百古來觀象聞虞皇締繡分明有六章  
女紅相習來亦久一日燦爛懸高堂周卿得此朱雀航  
施朱傅粉皆尋常寸心欲效仲山甫獻入明光補袞裳

修竹仕女圖

曾讀杜甫佳人篇佳人今向畫圖傳  
練裙縞袂春風裏  
不減花神并水仙  
牽蘿補屋居空谷  
日暮依然倚修竹  
只隔西隣尺短牆  
楊花榆莢紛相逐

送蔣蒲州

郎吏紛紛填仕途  
初試幾人為大夫  
如君本是青雲器  
有身豈合居江湖  
山右大州稱古蒲  
手中新分太守符  
昨聞州人告荒歉  
衆口待子歎且鋪  
進士中人不流俗

設施肯作科名辱  
忝徐豐登雞犬寧  
聊以茲行遂民欲  
宣武街頭車已裝  
乘此十日秋風涼  
青天眉宇太行秀  
平野襟帶黃河長  
州中父老出郊迓  
來日太守登公堂

楊太真剖瓜圖

深宮六月涼風至  
紈扇團圓奪秋氣  
却恨君王賜浴遲  
華清水熱通宵沸  
金刀手弄雲鬟低  
楊柳樓頭日已西  
莫誇碧椀紅瓢美  
玉齒病來憎瓠犀

為徐仲山題虎丘觀泉圖

徐子昔年官水部匹馬蕭蕭歷齊魯運河水滿萬艘通  
汶泗交流無壅土歸來泉志手親編好與河渠書竝傳  
不識當時陸鴻漸齒牙空味虎丘泉

園中晚步戲作

晚涼散步清陰下一樹古槐當廣廈畦間雨過井水渾  
牆上煙凝日光赭病來一月不朝參名姓在朝身在野  
要知未許吾獨閒舍有閒僅底閒馬城中塵霧漲天高  
披襟誰是同游者果然此日是匏翁昨種苦瓜今可把

為寧縣令蕭光甫題墨梅

老幹彎碕新幹直總是昆吾鑕色枝頭忽被北風吹  
併出踈花成戲劇薄如蟬翼細蝶鬚敢與臘雪偏相敵  
雪也無香復易消阻山背水俱無策花神冷笑不言功  
月下脩脩倚蒼壁狂遊不到綺陌間小隱時當野橋側  
平生高韻有誰知此種竒姿何處得補之已逝叔雅亡  
人間久矣無清蹟詩人未補白華詩畫家重倒金壺墨  
悠悠此意我所諳欲向蕭侯聊比德試看寧縣九年官

篋裏只餘花的士林傳玩等甘棠黃鶴樓中莫吹笛

戊申燕九日

正月十九為元長春丘真  
人生辰京師人為會甚盛

京師勝日稱燕九少年盡向城西走白雲觀前作大會  
射箭擊毬人馬吼古祠北與學宮依簫鼓不來牲醴稀  
如何義士文履善不及道人丘處機

中秋夜登仲山新樓賞月

天街東來喜橫亘夜靜無塵斷車乘青天故遣月娛人  
特為中秋月轉瑩昔人徒訝一分虧此物始知千里徑



團團餅餌家家如矮屋仰觀殊不稱望裏撐空木最高  
上施平板還加釘已好樓居仍好客主人引我凌飛磴  
解衣褫帶重留延案上珍腴已先飮須臾衆客報齊來  
一笑頻忘腰折磬庾公故事擬重修亦復平生無淺興  
少焉月轉簷楹間起傍朱闌時一凭俯觀南苑白茫茫  
素練平鋪日難暝中山地近兔毫分巨海波浮蚌胎孕  
舉瓢便可酌河水着屐那能絕泥濘椽筆誰將華榜題  
茲樓只合名超勝置身如在太湖心萬斛龍驤初下矻

端愁波浪欲掀翻為語諸公宜坐定羣童獻技舞且歌  
鳳腹空空四絃絙我方沾醉陶陶然新調疑從夢中聽  
夜深風露忽淒涼高處不勝寒起脛主人歡飲意何濃  
美酒如泉瓶未罄底須隔屋問西隣走送茶瓜勞僕媵  
明年未審在誰家鄉社佳期當預訂言方脫口客已聞  
吐酒闌然爭出應我家海月舊傳名菴外清光長有賸  
王猷隔巷每共之今者安知非我贈戲言若大却非誇  
薄意頗誠真不佞小園雖說乏樓居早向幽亭設長筵

杜老還教掃徑花  
范家莫道塵生甑  
諸公倘許過高軒  
就煩執此詩為証

謝安遊東山圖

東山高卧如龍蟠  
天下蒼生望謝安  
徵書再下翻然起  
五十不妨初作官  
征西將軍姓桓者  
致我胡為居幕下  
新亭狎視猶小兒  
流汗何人面如赭  
北兵百萬次淮淝  
別墅與客方圍棋  
捷書已至未終局  
江上阿玄班捷師  
高懷磊落多長技  
誰識向來遊戲事  
後世風流强慕之

登山也復攜歌妓

春溪聚禽圖

春溪遠發春山中一夜好雨溪流通綠波泛漲渺無際  
但見桃花千樹紅鴛鴦灘鵝何容與散亂中流錦為羽  
倉庚獨似避游人去踏花枝落紅雨草深哺子芳洲晴  
葉暗似聞求友聲展圖便有會心處放棹欲作春溪行  
玄裳縞衣彼何者為戀高松倚平野莫論鴻鵠志安知  
名字俱標在埤雅

早起

喔喔雞三唱城居數遠村  
髮隨秋葉落日與曉燈昏對  
案仍呼飯披衣又出門  
自憐衰朽質終歲謁天閭

送盛術還吳江

一舸東南去望望故里門  
夕陽煙市影秋水雪灘痕  
製藥當書案彈琴罷酒尊  
相過官舍裏應是史西村

壽席道士

白頭一羽客何處曾相逢  
月下老翁井雲間玉女峰  
蹠

蹏還似鶴變化真猶龍試問渠年紀山中有古松

送仲山後坐通法寺西軒

歌馬東城下緣堤踏淺沙長因送客日屢得到僧家灌  
木陰三畝奔泉響萬車晚來簷溜斷天際散紅霞

次韻時暘對雨喜晴二首

颯颯復霏霏清晨坐掩扉短籬垂豆角破壁上苔衣潤  
覺琴聲緩涼驚酒力微客棲詩句滿未許沈郎肥

斷虹連返照向晚喜新晴遠市浮埃盡長溝積水清歌

謠童子事刈穫野人情身在幽燕地無勞賦北征

送林朝信還廣西分韻得歲字

玉河凍不流曉結冰花細客館傍東堤三旬喜留滯捧  
表被光華開筵接親契抵任尚遲遲吳門度新歲

喜儲靜夫考功自南京至

與子三年別長存耿耿思偶來今日雨又屬暮春時風  
度看逾好功名喜未遲吏曹能自署應不數光義

晚至湖上

到湖疑路盡忽復轉林塘雨後添泉脉雲中漏日光新  
蒲仍自綠怪柳不成行欲唱吳歌去憑誰覓野航

次韻賓之重九值雨獨至

懷麓堂前樹蕭蕭感暮秋閉門逢節序落帽想風流空  
負此時酒閒登何處樓不須論雨識四野少禾頭

次韻濟之招仲山酌別

偶值三旬隙堪償千載忙有官原是夏此日豈無陽重  
過煙花市長驅翰墨場不緣持玉節安得解銅章未去



須常會將來孰可量試看王子宅或比鄭公鄉飲處誰  
招得行機已坐忘園蔬從嫩摘山果更高裝弄月當花  
檻臨風泛羽觴幽篁如客瘦獨鶴擬人長使者新恩渥  
儒生故態狂陽關莫先唱西出路微茫

謁韓蘄王墓

家國何多難推尋為蔡童羸秦方逐北周室竟遷東江  
左朝廷在淮南驛騎通天終憐宋土時則有韓公一劍  
橫天外諸酋在目中南雲當箭鏃黃蓋走艤艫伐越期

成霸于潛恥會戎蕭牆狼跋盡野穴鼠羣空聚米籌三  
鎮開門待兩宮齊王真濟美鄂國與爭雄有詔從中制  
惟詩詠內訌間游嗟我獨和議約誰同殉葬長弓勁題  
名片石穹龜趺呈細刺龍額表孤忠草樹樵蘇斷淒盛  
享祀豐神靈懸皎日生氣亘長虹異代今全盛應追保  
障功

送同年簡齋道歸省

春半相逢在禮闈題詩忽復送君歸盧前名姓慙楊炯

洛下文章見陸機曉日攀龍恩共沐秋風躍馬去如飛  
新年草色知人意應向階前映綠衣

壬寅正旦侍班

爐煙如霧藹彤墀半啟金門複道時咫尺星辰華蓋轉  
中央日月袞衣垂普天鳳曆開寅歲平旦雞人報卯時  
御座不勝袍笏近侍臣偏識漢朝儀

送郭翔鵬進士知福寧州兼寄州倅馬庭簡

閩海遙遙獨置州忽看秋水動扁舟暫為魏闕三年別

定向吳門十日留  
甲榜尚稱新進士  
雙旌已作古諸侯  
公餘獨恨詩筒少  
為謝同官馬少游

送劉職方時雍赴福建參政

早振詞林五色翰  
廿年郎署忽彈冠  
校書劉向成新序  
判事姚崇起夏官  
楚客不驚湖海濶  
閩山能阻雪霜寒  
他時召伯甘棠樹  
只是南風荔子丹

冬至謁陵出土城

馬上衝寒出北門  
豁然平曠識乾坤  
地連周圍民猶小

天作燕山勢獨尊  
看月未忘黃土寺  
披煙仍見白浮村  
百官令節長來此  
遷豆如流習駿奔

渡沙河

橋下流漸玉一灣  
十年重此照衰顏  
疎林小店行厨設  
落日平原獵騎還  
韋杜南連多白草  
居庸北界盡蒼山  
天寒喜報王師轉  
驛路無塵羽檄閒

望昌平

脫轡平凌千丈岡  
披裘人耐北風涼  
迢迢古轍餘秋潦

漠漠平疇已早霜日隱峰巒天易暝樹連城郭路何長  
孤雲飛處梁公廟猶似當時望太行

作鶴房

枯篁密葦作房櫳故遣仙禽宿此中曾見江南多鴨舍  
亦知吳下賸牛宮綢繆牖戶朝南日倚傍垣墉避北風  
莫笑乘軒如衛懿苦寒須念雪園空

送劉世熙赴四川僉事管水利

行行萬里去分司直到西川欲盡時肯使江流歸灩澦

還看山月照峨嵋外臺總自刑曹出上馬親將御勅持  
千古李冰功不廢離堆刊木建生祠

宿呂城

連朝離抱不能平又記南來宿呂城酒散長亭驚雨至  
棹依高岸識潮生麥秋未到猶三月瓜步將臨只一程  
賴有故人同夜坐白頭相對燭花明

題青州先賢祠

汴宋人才軼古先東方作郡總名賢朝廷擇相多從此

州縣勞人豈信然  
隱隱故疆分海岱  
堂堂遺像照山川  
至今新廟煩虛位  
莫道前修美獨專

追送張尚質戶部兼懷沈仲律主客

秋風騎馬向南行  
送別深慚句不成  
顧我只如前日懶  
思君應比後湖清  
朝回曉月當瓊島  
夢逐春潮到石城  
遙想齋居無俗客  
相過多見沈雲卿

上元夜戴中書宅賞燈

南客相逢惜此宵  
燈詞酒令破寥寥  
莫教隱几生春夢



就可聯鑣去早朝  
日色漸臨青瑣闥  
風光多在玉河橋  
休文不赴斯文約  
應是嗔人折簡招

送姜用貞赴南京刑部因懷項文祥

南去分司畫省郎  
行行因得奉高堂  
已如毛義為人子  
早向宗元識吏商  
春草訟庭稀獄案  
碧山官舍有書牀  
項斯別後年華改  
為謝無詩遠寄將

與諸友東郭草亭看牡丹二首

曾是平章宅裏花  
賞時還在故侯家  
帝鄉況有此亭古

人世但知今日嘉吟興待生滄海月醉顏驚見赤城霞  
風流前輩凋零盡欲覓遺蹤事已賒

背郭林亭風物幽綠陰時節更須遊獨憐芳草容人卧  
多謝名花為客留錦水築堂從杜老漆園成器想樊侯  
暮春未許山陰占今日燕南禊事修

與蔣宗誼城東觀泉因憶舊談越中五洩之勝  
秋早俄驚急雪流夜來高岼雨初收同行賴有三山客  
試問何如五洩游歇馬旋成燕市飲扣舷遙想越人謳

玉泉山路涼風爽還約尋源向上頭

謝馮佩之次韻送鹽筴

桃竹初疑一束開齒牙還辨越船來囊盛藤子新題帖  
飯煮芹菹漫作堆興逐先春風味勝功收斥鹵雪花鬼  
任渠老硬相評品未許伶倫當管裁

夜坐懷齋居諸公次前韻

布衾寒擁對牀屏鵲遶南枝月過庭瞋目誰除童子障  
齋心自比太常醒花時漸好仍籠霧燈節相催屢問星

便有玉堂天上意銅鑪當案冷煙青

游朝天宮

撲衣塵霧入門消修竹奇松步履遙紫府新開延日月  
碧臺高築倚雲霄城頭瑞鶴招還下海上枯槎坐欲漂  
為憶仙家爛柯樹手摩石刺是前朝

送僧永岡歸吳佳白馬寺

石縫梅泉一縷清早年依此學無生紫藤垂塢人間步  
白馬馱經寺得名法席坐揮撥拂短官河去上木杯輕

山中試茗何時好擬借禪房折脚鐺

火花

細蕊紛紛頃刻開環觀火候亦奇哉  
春回玉管微微動風定金沙颯颯來  
桂子忽從天上落蓮花誰向水中栽  
夜庭一霎聊供笑坐客休將見跋猜

答雪屋上人

艤舟山足扣禪機記得雲林啟半扉  
靜夜香爐渾不冷深秋書札未應稀  
雪中老屋懷簷蔔湖上長鏡負巖巖

須信大顛詩律細世人休更笑留衣

送賀澤民赴河南僉事

御史才名闕下知外臺行赴領分司芻衣未敝何須改  
螭墨當坳尚不移南浦吟成芳草色曲江過盡杏花時  
諍臣自古關休戚漢使行將召望之

謝孫希說送長鳴雞

何物襪襪白錦毛庭前解縛便長號徒聞野鷺令人愛  
未許蒼蠅代爾勞拔距羣來如赴敵裁冠獨立自分曹

夜深風雨偏安枕  
鋪飯從今謝子教

玉延亭成次韻玉汝

偶栽山藥得佳名  
墻下幽亭一日成  
車馬勒回無俗士  
壺漿傾倒盡平生  
升階脫屣長頭近  
倚檻觀書老眼明  
此後來游誰復障  
繞籬須為惜殘英

次韻諸友玉延亭聯句

樓高未許卧陳登  
聊結荒亭揖客升  
坐定園花紅雨斷  
望迷宮樹綠雲層  
墻低漸覺簫聲近  
杯淺休嫌酒面澄

願得留詩成故事西菴入夜更挑燈

喜原輝弟至京

遠道親攜藥裹來當門下馬拂黃埃不驚舊日形容改  
猶記前宵夢寐回出巷親朋宜漸訪上牀兒子欲相陪  
平生四海尤憐汝得向窗間笑口開

送原輝南還

清秋欲盡向南旋別淚何堪重泣然吾已行年當五十  
汝今歸路又三千亦知禁酒勝良藥好為修書附便船



金少卿集卷之八  
舊業東城勞葺理相期歲晚在園田

出昌平

晴旭熏人屬仲冬  
茆簷誰識煖如烘  
冰花細結重溪石  
天籟遙傳萬壑松  
此日清酣除酒禁  
諸公太瘦帶詩容  
來春裊茗應非晚  
最愛池泉飲九龍

次韻施煥伯自製菜燈見送

龍從翠玉巧相連  
疑送春盤入夜筵  
園子看來偏錯若  
市人攜過已喧然  
肯將根柢埋泥土  
未許光華照木天

賸有儒家風味在買油聊費幾青錢

秋享致齋呈同館諸公

紫禁門深早散朝步歸齋閣坐寥寥日高宿霧渾如撲  
秋至涼風不待招河上圉人來浴馬樹邊童子去承蜩  
詩仙只在爐烟底翻盡晴窗白雪謠

次韻侍郎王公還南京留別

秋水浮來畫舫新南歸仍喜度天津未從江左誇王導  
如向朝端見李紳黃菊又逢燕地晚青山偏愛秣陵春

陞辭却枉重瞳顧應識青宮舊學人

贈顧正科鏞還中都

清晨持刺叩門投有客來從淮水頭  
吳下故家依二曲沛中遺調習三侯  
閱人詩畫才情麗傳世衣冠仕路優  
欲盡尊前鄉土話雪晴歸騎恨難留

謝濟之送銀杏

錯落朱提數百枚洞庭秋色滿盤堆  
霜餘亂摘連柑子雪裏同煨有芋魁  
不用盛囊書復寫料非鑽核意無猜

却愁佳惠終難繼乞與山中幾樹栽

對雨

清池水長欲平橋雨勢渾如上晚潮泛泛漸於亭礎近  
淙淙真是覓泉遙即看竝浴鷺羣戲却恐新生魚子漂  
東望菱濠歸去好吳儂家有木蘭橈

次韻任太常致仕留別五首

歸去如公未當貧清溪碧嶂自為鄰地偏易覺柴門晚  
室暖先知布被春書為長觀成故紙衣從新浴少浮塵

集雲山下吾廬在得向今朝置此身

此身真喜置吾廬尚有牀頭一束書海口潮生知進退  
天心月到識盈虛已辭朝士誰通訊欲就漁翁更卜居  
百里好山俱在眼只教童子導籃輿

籃輿朝出看山初懶學陶潛去荷鋤新法不行誰執拗  
舊書無用是潛虛俗人自詫才名盛老態終嫌禮法疎  
三月柴門無客到日高閒把白頭梳

濯足梳頭舊有緣更交午睡學坡仙一身自足三間屋

百歲誰增半畝田  
遇壑便回憂險地  
看雲高坐愛晴天  
朝雞官馬俱無用  
贏得工夫是晏眠

晏眠不覺過殘冬  
枕上哦詩做鮑容  
猶喜形骸從小隱  
肯將姓氏入斜封  
日中塵滿爭為市  
樹底陰多獨課農  
應笑丁公偏差異  
宵深腹上夢生松

觀耕籍田

春郊風動綵旗新  
快覩黃衣是聖人  
盛禮肇行非自漢  
古詩猶在宛如幽  
朝臣共助三推止  
野樂全勝九奏頻

稼穡先知端可賀  
桑盛不獨備明禋

送賀御史出守蘇州

吳民方切九重憂  
祖道休將五馬留  
朝宁久稱真御史  
封疆還屬古諸侯  
香凝燕寢韋郎詠  
棹續花橋白傅游  
我忝郡人無以頌  
擬叨循吏傳重修

宿功德寺航公房

山下禪堂向晚登  
扶筇一笑有盧能  
飯餘蔬筍收齋鉢  
供雜香花映佛燈  
漠闕乍違同野吏  
吳音無解盡鄉僧

蒲團睡穩回清夢風雨蕭蕭撼古藤

飲玉泉二首

龍唇歆薄淨無腥純浸西南萬疊青地底洞名疑小有  
江南泉品類中冷御廚絡繹馳銀甕僧寺分明枕玉屏  
曾是宣皇臨幸處游人誰復上高亭

垂虹名在壯神都立酒為池不用沽終日無雲成霧雨  
下流隨地作江湖坐臨且脫登山屐汲飲重修調水符  
渴吻正須清冷好寺僧猶自置茶爐



徐州重修黃樓

樓中不見羽衣人  
黃堊依然四面新  
坐使河流循故道  
俯臨山石倚長津  
名邦信美皆吾土  
勝日登高與衆賓  
從此欲傳州守事  
只須題壁掃清塵

葉翁以叢竹分種因題墨謝之

東菴青青早見分  
歲寒別種共欣欣  
世間益者成三友  
林下賢人詠五君  
雨過不須論醉日  
風回時復見晴雲  
傳神妙手今難得  
聊入筠窗翠鳳羣

送陳一夔調瑞州同知

古筠南去興飄然僕子詩囊早在肩  
莫以瑕疵論白璧不妨顏面照清泉  
秋江直入吳中路春樹遙瞻渭北天  
壯志未衰功業始蓴鱸誰愛味新鮮

送林世調赴湖廣叅政

已愛超遷愜所推不知清議尚嫌遲  
省中公事方多日席上同年漸少時  
西控早成持檄夢南行兼慰倚門思  
春來舍館渾如舊荀氏于今更一慈

十六夜邀仲山濟之禹疇飲

雪月交輝嘆未曾寒生硯沼見春冰  
年將六十應推我地近西南已得朋  
坐久市燈無一盞飲來官酒只三升  
山陰回棹真堪笑此夜分明興可乘

後夜無月

月向圓時正好看浮雲入幕故漫漫  
陰晴明日真難料用舍平生只自安  
天上無人收倒影海東何處溢清寒  
虛簷不礙長松樹獨坐胡牀到夜闌

中秋後二夜獨坐

不須把酒問青天秋色平分恨稍偏已覺初昏星漸密  
難教既望月長圓詩中蟋蟀依牀下江上芙蓉到檻前  
更有桂花香可挹虛堂獨坐未成眠

夜宿啟南宅風雨大作

賓筵燈燭對清光更許扁舟繫岸傍衆竅盡號風在野  
舊痕猶記水侵牆草堂突兀春星暗柳市回環海浪長  
天意莫言能殢客老年難自別西莊

太廟候祭復游東園

百畝園依清廟開，去年初夏憶曾來。  
繁花盡落留紅藥，新笋叢生帶綠苔。  
北闕倚雲通劍佩，南宮隔水見亭臺。  
令人頓作山林想，況有蕭蕭白髮催。

次韻玉汝報恩寺訪舊蓋嘗同寓文僧房今三

十二年矣

步屐重臨塔影邊，禪房深處裊香煙。  
金陵黃氣惟當代，蘭若清氛似往年。  
花石映門幽徑側，竹林圍屋古臺前。

舊游零落多詩思莫怪摩挲為悵然

偶有客言以老態從上為壽徵戲成絕

白盡髭鬚正不愁吟詩撚斷更風流從今越把詩吟苦  
索性還教白到頭

詠南內新柳

節近清明楊柳新玉河橋畔少車塵都門送別應無數  
不許臨岐折贈人

綠嫩遙看更碧柔非煙非霧曉難收牆高不使花飛過

却化浮萍出御溝

墨竹

深林不減篔簹谷  
亂影都歸丈八溝  
最愛長竿如綠玉  
何年去上釣魚舟

趙松雪蘭竹圖

鷗波亭上春風筆  
秀色翛然共一丘  
頭白江南真想見  
幽蘭叢竹帶桑洲

為奎姪題石田雪景

瑤林依石斷雲攢雪後西山更好看憶向越來溪上過  
梅灣玉削數峰寒

題陳季昭畫

金昌亭側舊樓居索畫人來坐不虛誰信高年筆猶健  
案頭臨畫似臨書

題王浚之畫茅山圖

句容古縣頻來往萬轉荒溪出亂松畫裏茅山依舊在  
白雲開處見三峰



雪寒探梅

新年京國競繁華  
東巷深居自一家  
春到不如吳下晚  
石湖詩裏探梅花

夏日園中小適二首

藤蔓紅稀棗葉青  
欲逃新暑只登亭  
夕陽西去清陰滿  
閒向籬根拾鶴翎

荷錢初放亂浮萍  
却有新條結翠屏  
幾日小園無雨到  
莫斟池水入花瓶



石倉歷代詩選卷四百十八

欽定四庫全書

石倉歷代詩選卷四百十九

明 曹學佺 編

明詩次集五十三

楊脩吉

黃河阻風有作

風乃天之威可有不可弄如何兩晝夜赫赫操柄用小  
舟亦何力乃欲當鼓動況在四野間號怒聲亦縱蓬蒿

盡翻飛撈摘疲僕從客子不敢起卧久筋骨痛衾裯冷  
如潑雙脚盡僵凍早炊告將及乏米自探瓮幸有文字  
携會不廢吟誦晴明坐可待日影來隙縫人居忘道途  
于茲復淹壅因憶向所經一一皆成夢

抄書

沈疾已在躬嗜書猶不廢每聞有奇籍多方必圖致手  
錄畏辛勤數紙還投弃質人供所好恒輟衣食費往來  
遠案行點畫勞指視成編亦艱難把玩自珍貴家人怪

何用推却從散離亦蒙朋友笑既宦安用是自知身有病不作長久計偏好固莫捐聊爾從吾意有子雖二人未知誰可遺我但要披閱豈復思後世逢愚聚亦散賢即能添置區區慮遠心何其錯為地不如供目前開卷有真味

題書厨上

吾家本市人南濠居百年自我始為士家無一簡編辛勤十餘載購求心頗專小者雖未備大者亦略全經史

及子集無非前古傳一一紅紙褻辛苦手自穿當怒讀  
則喜當病讀則痊恃此用為命縱橫堆滿前當時作書  
者非聖必大賢豈待開卷看撫弄亦欣然奈何家人愚  
心惟財貨偏墮地不肯拾壞爛誰與憐盡吾一生已死  
不畱一篇朋友有讀者悉當相奉捐勝過不肖兒持去  
將鬻錢

詠陽山雲泉菴大石奉和諸公同遊聯句之作  
偉哉此陽山有石俟歌誦形將冰塊截勢與蓮花共仰

觀一何高登陟不可輕鳥飛必迴翔雲出自騰渝孤圓  
外成嶠空朗中含洞瘦如辟穀良清若食蚓仲深思殆  
天設乍至令人恐濃蘿作垂陰寒泉滴為凍戴菴亦顛  
危携觴更交綜耳脇或駢攢勒拳時獨送巍巍上少並  
森森平多從荒厓始誰開倒樹諒非種在茲三吳間當  
以九鼎重崇巖借冠冕卑巒聽提控勞呼猿固匿被壓  
松堪訟曲躬始得門側身還入街拂苔劣容眠收乳兼  
資用志猶記泰餘材遺遺禹貢立久氣濕袍嘯高聲答



龔論年越殷周言時晦唐宋一為佛者居永作遊人奉  
病宜謚著史寐稱搏養永四方傳不誣諸公評切中臨  
谷足還酸乘巔目偏縱支頤詎厭看極目難竭諷鬼鑿  
手須胼鯨負背應痛束岱徒小魯西華繆推雍懸磬風  
發明香爐煙結供曝沙伏靈龜食岡停遠鳳是知隆拔  
羣所貴秀合衆偷餘殿容榱就隙亭閣棟枯藤蔓穿竅  
長蛇舌掠縫輕盈受指彈玲瓏脫泥壅芾拜本無忝羽  
撼爭得動栽培稀尺閒構架靡寸空炎伏涼自生清秋

月堪弄林深必賴燭嵐酷能作鬬星光猶立芒龍吟殊  
叶碯嶺獅馴以賓阜寧敢與閑久嗟隔勝賞頻勞落清  
夢即欲營終棲其柰懷微俸

靈谷會宿次韻

靈谷古名利四圍山成翠梁人之所建唐碑猶未毀入  
門青松密綠徑野花媚清居特幽深竒境自零碎無泉  
不濟渴有石可眠醉茲遊時日良在會賢豪備溪漁薦  
肥鮮野果羅甘脆縱橫鞍在馬掩映袍明雉喧喧笑語

冷衮衮酬酢亟惟彼官坐衙有若賈居肆苟非自抽拔  
終當老關閉孤忠林員外大魁儲主事周公以鄉集余  
子用隣至誰知四海望乃今一日萃名為問疾病實則  
尋遊戲高步履聲遲雄辯詞鋒利興寘入雲鴻才捷追  
風驥天涼秋可坐月皎夜不寐主人雖好客難免紙筆  
費

詠蓮房

白露褪紅衣亭亭挺寒碧污泥乍相辭衆果何敢敵倒

持若覆杯平放如架情折莖脆連絲啖實甘流液味帶  
湖波鮮態含溪雨側蜂巢開戶牖蠶繭謝洪漣倩兮笑  
靨多駢甬釘頭積誰知心獨苦却訝紋常襞樽前憶吳  
歌老去傷國色何慚登鼎俎自可利胸膈載來馬蹄圓  
刺出魚眼赤謫仙號猶存濂溪愛非假奴視栗與梨句  
賞主為客時新想南濠土產誇東潮水神怒擎拳溪女  
采畱跡感子遺瑤瓊深情在鄉邑

石假山

何哉奇復奇聚此照眼碧玲瓏千百竅突兀八九尺中  
居獨尊巖傍擁互扶掖猊雄怒張吻馬瘦高見脊枯藤  
絡巖生老檜鑽岬坼網湖水獻寶斧山雲失宅飛來驚  
峰我推開劒門剗狎觀常解帶肅拜或呼憤勢掩肺腑  
層形標拳臂隻浪淘猶見紋虎爪仍存跡朝惟講僧坐  
夜乏將軍射三槎非可參一拳茲乃積風雷蓄深杳花  
草栽狼籍磨堪鏡功名眠可携被席曲折畫手知巧妙  
詩家得陟磴披翠篁臨池扣金鯽林泉釣初心漁樵盟

舊癖空支九節杖，莫縱千仞屐。窓窺雖眇小，意賞同弘碩。  
幸忝司郡人，寧愁竊中夕。

都下夜集對雨

高筵啓秋雨，頓爾淨餘燭。階前渠溜走，燈下簷花落。蕭  
蕭贊歸懷，潺潺亂歡謔。來同街枚陣，響失巡更柝。積陰  
已連朝，浮潤先微昨。塵消目俱清，風生窓盡廓。卑棲雞  
自鳴，餓勒馬方嚼。滴成旅况愁，罰遣吟筆閣。一笑紀新

詩趨朝明又各

送楚巖住支硎山

昔有支公者曾為此山客至今石磴上猶存馬歸迹寒  
泉出傍澗散漫流不息何人作大字筆勢甚奇特巖巖  
圓通殿飛構爛金碧春來香火盛傾城出遊適施錢日  
滿鉢來往恒絡繹世人競刀錐于此乃不惜我當少年  
時一歲嘗一即提携隨父兄娛覽常至夕別來已幾時  
何啻十年隔此山是名山先從晉時關非有高行僧何  
堪主其席今師遂當往遠續前人蹟我今何以贈小謁

聊塞責切煩大士前我為啓胸臆慧眼無不觀是物皆  
潤澤如何不見我因此塵俗役願垂楊枝露灑我一點  
滴不願官祿高不求財寶積但願塵勞中早脫奔走厄  
無災復無難居家作禪伯保此清淨心永離種種色與  
師結晚交來著登山屐

淨公住東隱

山水誰不愛顧乏能遊人澗中本多勝石秀而泉淳向  
者雖一到終是居官身抱官遊山水味自不相親今子



遂當往我亦解朝紳相從巖谷裏以子為依因子將舊  
草履我有新葛巾滴泉與片石務搜天所珍

殘雪

殘雪經時久常聞簷溜聲謂晴階又濕疑雨日還明地  
背融偏後宵寒凍復成不妨畱尺寸借爾照書楹

旦公住寶積寺

古寺石湖邊為僧今幾年開堂小遊戲出世大因緣生  
死一夢耳江山常熾然遙知末句子不肯向人傳

鄂首座還山

病中承數過清話一爐香對食同甘菜忘形不下床壁  
間懸笠破門外倚藤方惆悵明朝別何人訪寂鄉

嚴長老歸寶積

黃蘆寶種寺創自鏡禪師佛殿已百歲僧房今六枝洞  
房山出牖笠澤水通池他日吾將到來題壁上詩

除夜雜咏

歲除當此夜灑掃事匆匆井上皆封草門前盡畫弓祠

堂神影挂客座佛筵崇撒豆祈兒疾存炊忌釜空辟瘟  
燒木爇承俗燎柴紅啓篋新衣振除庭舊室攻買餽迎  
竈帝酌水祀牀公春帖題鄉究年書誦學童插籩皆拍  
葉戲火有黎筒殘厯收年盡深缸洗腸終市闌驕  
隣里饋糕通未識他州節於斯異與同

元已見過

忝作城南酒主人盤飧雖少意慇懃中年流落堪垂淚  
荒里經過每借春久伏海鄉諸念息一逢朝士偶聞新

興懷及此能無感當念休嫌歎息頻

見白髮

料應白髮有來時三十登頭似未宜愁已生根從汝摘  
老先呈態要人知莫勞曉日梳千下終見秋霜起一絲  
若道只因詩故白隣翁元不會吟詩

果前堂南歸

雲水飄然一老僧頭顱種種貌稜稜人間正果脩將滿  
海內名山遇即登向外見來終不實從前學得是無能

此歸莫向舟中結且卧隨身七尺藤

東昌贈朝用同年

雪晴相訪滿階泥流水淙淙總入溪名忝同年雖幸甚  
會從開牖已難齊杯盤簡儉情偏厚器局深沈語益低  
一夜東昌城下泊歸心非緩為君羈

寄賀故人新受河間學職

別君無幾聞君選知在河間作教官花遶郡城皆芡藕  
味多鄉物是魚鰻在京故舊通書易按部台司責禮難

請得俸糧休別用多抄經籍老來看

新治小軒成

費將心力治齋居細竹移來葉尚疎  
雪白螭光鋪榻眼鴉青布色染簾裾  
規模別出經營外景物新呈晦沒餘  
髹壁正妨童穉汚粉牆還待友朋書  
今宵纔是題詩起此席方為讌客初  
前郭後村無曠地相過莫訝少寬舒

滴露菊

花露秋香滿紫苔芳根重見一枝開  
何當移取金莖去

雲表扣將玉屑來

錦雲紅

僊娥雲錦織鴛機吹落  
花開祗欲飛畱在山家  
無客處  
容教玉女剪春衣

賽西施

越國佳人天下奇此花  
尤更美丰姿當時若使  
吳王見  
肯醉芙蓉太液池

白西施

膩粉脂容玉雪膚花神瑩白羨吳姬秋風素魄東籬下  
不逐鴟夷泛五湖

醉楊妃

一枝無力倚娉婷曾記真妃醉未醒不道沈香亭畔寵  
秋風籬落易飄零

孩兒菊

軟玉肌膚膩粉姿啼痕彷彿露香垂一枝低卧苔煙上  
似向花房壓被時



勝黃金

中黃一氣稟坤宮  
苑北園南色更濃  
總使秋陽如烈火  
肯隨朝露便消融

玉錢菊

不隨九府鑄青銅  
刻玉雕瓊巧用工  
憶共花鈿零落後  
至今狼籍怨秋風

寒菊

金葉熒煌翠葉圓  
移栽花屋最宜看  
一冬齋閣深深閉

畱待秋香到歲寒

黃牡丹

京洛豪華迹已陳  
姚家春色對何人  
于今寂寞東籬畔  
又作黃花十度新

小金蓮

黃金小朵爛光輝  
曾近雕闌照繡衣  
幾度醉看花上月  
絕勝宮燭夜深歸

白荔枝

娉得嬌如十八娘  
肥膚清潤雪生香  
阿環此日能相見  
憶却金盤玉露漿

玉菡萏

分得瑤池種最奇  
半含香露尚開遲  
風清月白東籬畔  
猶憶江邊欲墮時

紫丁香

番舶何人得種來  
紫尖香蕊果奇哉  
春風枝上相思恨  
結到秋深尚未開

玉兔華

廣寒玉兔落陰精  
秀結秋風一種青  
却笑風霜憔悴死  
虛勞搗藥濟長生

鴛鴦菊

韓朋魂魄舊風流  
結就花枝也並頭  
千載未消連理恨  
尚留殘蝶戀深秋

鸛翎白

何處仙胎脫縞衣  
傲霜枝上弄清輝  
可憐不得青田夢

幾度臨風祗欲飛

剪鵝翎

鵝鵝霜毫蛻滿池  
天工碎剪上花枝  
折來插在烏紗畔  
絕勝春蛾點髮絲

麝香黃

誰向西風剖麝香  
餘芳濃染露華黃  
秋光老圃無人識  
石竹叢叢蔓草荒

鶯羽黃

流鶯春夢落東籬  
金縷衣裳憶舊時  
五柳門前飛不去  
羽毛零露作花枝

疊雪羅

宮衣朝賜雪生香  
團扇春風日正長  
此際看花還舊色  
重陽錯認是端陽

僧鞋菊

鳬舄當年巧製裁  
曾隨老衲步雲臺  
逃禪誤落東籬下  
化作霜花九月開

銷金菊

誰抹泥金上絳綃要將花藥闌春嬌  
党家帳裏清歌歇一點餘香尚未消

金鈴菊

黃宮小朵綴金鈴風動花枝似有聲  
曾憶絳羅幃惺底飛來山鳥亦相驚

玉連環

雕瓊刻玉闌玲瓏奇巧分明出化工  
都作連環鉤結相

不教花片逐春風

蠟瓣紅

煜煜丹葩滴露濃  
蜜脾光暖惹遊蜂  
花神恐怕偷香去  
故把芳心絳蠟封


紫霞杯

臨風翠袖立徘徊  
似捧流霞漱滌杯  
却憶當年陶令宅  
花前幾度玉山頽

百花菴主見訪



一春高卧只垂簾說着浮名病又添聞道百花巷可住  
他時容我讀華嚴



石倉歷代詩選卷四百十九